

**Naqqiut**

Siunnersuut 22. august 2022-meersoq taarserpaa

(Naqinnerlutani naqqiisoqarpoq, inatsisit teknikkitaanni naqqiisoqarpoq aammalu nassuaatini  
erseqqissaasoqarluni)

Siunnersummut nassuaatit

**Nassuaatit nalinginnaasut****1. Aallaqqaasiut**

Nukissiorfiit ataavartumik nukissiorneq ukkatarineqaraluttuinnarluni mingutitsinngitsumut allanngoriartitsinermi inuiaqatigiinni qitiusumik suliaqartuuvoq. Suliap ingerlanerani tassani ingerlatseqatigiiffik aqutsinikkut annertuunik periarfissaqarpoq anigorniagassaqarlunilu.

Aammattaaq annertoorujussuarnik iluarsaassineremi kinguaattooruteqarluni kiisalu qanittumi ungasissumilu aalajaatsumik nukissiamik pilersuinermik inuiaqatigiinni qulakkeerinissamut pisariaqartumik annertuunik nutaanik aningaasaliinissamik pisariaqartitsilluni, Nukissiorfiit anigorniagassaqarpoq .

1986-imi naalagaaffiup GTO-mi suliffeqarfiata tiguneraniit, suliffeqarfiup Nukissiorfiit ullumikkut ingerlataani aqutsinikkut anigorniagassat ullumikkut allaanerulluinnarput. Naalakkersuisut aamma Nukissiorfiit akornanni pisariinnerusumik suliassat agguarsimanissaat qulakkeerniarlugu, Nukissiorfiit siulersuisulerlugit pisortalerlugulu marloqiusamik aqutsinermut ilusiliinissaq siunnersummi siunertaavoq.

Naalakkersuisut Nukissiorfiit ingerlataannut nukissiornermut politikkikkut killissaliussanik aalajangersaasarnerat ingerlaannassaaq, Nukissiorfiit killissaliussat taakkua iluanni suliffeqarfimmi aningaasaqarnikkut sunniuteqarluartumik ingerlatsinissaq isumannaatsumik ingerlalluartumik qajannaatsumillu innaallagissamik, imermik kiassanermullu pilersuineq siunertaralugu nammineerluni atugassiisinhaassalluni. Tamatuma pinissaanut illuatungeriit piginnaatitaanerat pillugu paasiuminartunik ersarissunillu maleruagassaqarnissaq pisariaqarpoq.

Siunnersummi ajornarunnaarsinneqarput:

- Nukissiorfiit suliffeqarfimmi pisortaatitat saniatigut siulersuisunit aqunneqassasoq.
- Nukissiorfinnut siulersuisoqartillugu pisortaqartillugulu marloqiusamik aqutsinermut ilusiliinissaq.

- Aqutsisut akisussaaffiisa piginnaatitaanerisalu ingiaqatigiinnerunissaat.
- Nukissiorfiit inuiaqatigiinni siunertaqarneranut aammalu suliffeqarfittut imminut ingerlatitatut inissisimaneranut naleqqussakkamik aqutsinermut ilusiliinissaq.

## **2. Siunnersummi immikkoortut pingarnerit**

### **2.1. Inatsisit atuuttut**

Nukissiorfinnut inatsimmi tunngavissani Grønlands tekniske Organisationi pillugu Inatsisartut peqqussutaat nr. 8, 19. december 1986-imeersoq (Grønlands tekniske Organisationi pillugu Inatsisartut peqqussutaat) malinneqarpoq. Grønlands Tekniske Organisationi pillugu peqqussummi §§ 1-imi, 3-mi aamma 4-mi suliffeqarfiup pilersinneqarnera, aaqqissuussaanera, aqunneqarnera ingerlanneqarneralu pillugit makkua allassimapput:

*”§ 1. Kalaallit Nunaanni Namminersornerullutik Oqartussat Grønlands tekniske Organisationi, GTO, 1. januar 1987-imi tigussavaat.”*

*”§ 3. GTO Namminersornerullutik Oqartussat ingerlassaattut aaqqissuussaassaaq qullersaqarfia Nuummi inissitaalluni.*

*Imm. 2. GTO pisortamit aqunneqassaaq Naalakkersuisunit atorfinit sinneqartumit.*

*Imm. 3. GTO-mut ukiumut atugassiissutit Inatsisartut aningaasanut inatsisaatigut aalajangersarneqartassapput....”*

*”§ 4. Naalakkersuisut § 2-i imm. 1-imi taaneqartumik suliassat isumagineqarnissaat qulakeerniarlugu GTO-p aaqqissugaaneranut, ingerlanneranut aqunneqarneranullu erseqinnerusunik aalajangersagaliorsinnaapput”*

§ 3 malillugu Nukissiorfiit suliffeqarfiuvoq imminut ingerlatitaq, suliffeqarfiup toqqaannartumik politikkikku aqutsinerup ataaniinera ilisarnaataalluni. Nunatta karsia suliffeqarfimmuit toqqaannartumik akiliisussaavoq. Taamaattoq ingerlatsiviup nalinginnaasup paarlattuanik Nukissiorfiit pisuussutaanut tunngasut aammalu naatsorsuusiortarnera nunatta karsianut sanilliullugu ilaannakortumik immikkoortuuvoq. Naatsorsuusiortarneq pillugu aalajangersakkat ersarinnerusut Namminersorlutik Oqartussat suliffeqarfiutaasa nammineertitat naatsorsuusiortarnerat pillugu Namminersorlutik Oqartussat nalunaarutaat nr. 24, 22. december 2017-meersumi aalajangersarneqarput.

§ 4-mut ataasiakkaanut nassuaatini ilaatigut makkua allassimapput, takuuk Grønlands tekniske Organisationi pillugu Inatsisartut peqqussutaat (UKA 7/1986) 29. september 1986-imeersoq:

*”GTO tunngaviatigut maannamut ilusaa atuutsillugu naalagaaffimmit tiguneqarpoq. Kisiannili tamanna isumaqanngilaq, tamanna pisariaqartoq imaluunniit nalequttoq paasinarsissagaluarpat, ilusaa tamatuma kingorna allanngortinnejarsinnaassanganngitsoq.”*

Nassuaatini tikkuarneqarpoq, siunissami GTO-p (Nukissiorfiit) ingerlatseqatigiiffiup ilusaanut allamut allanngortissinnaanissaanut Namminersorlutik Oqartussat periarfissaattut piginnaatitsissut eqqarsaatigineqartoq, tassa imaappoq assersuutigalugu aktiaatileqatigiiffinngortillugu. 1987-mi Grønlands tekniske Organisationip aqqa allanngortinneqarpoq Nuna-Tek – Nunatsinni Teknikkikut Ingerlatsivinngorlugu, 1991-imi Nukissiorfinnut aqqa allanngortinneqaqqilluni.

Nalunaarasuartaatitigut atassuteqarneq nalunaarasuartaaseriveqarfiillu pillugit Inatsisartut peqqussutaat nr. 7, 19. december 1986-imeersumi § 1-imi makkua allassimapput.

*”§ 1. Kalaallit Nunaanni Namminersornerullutik Oqartussat tamanut ammasumik nalunaarasuartaatitigut atassuteqarnermut kisremaassinerini ilaapput telefonimik, telegrafimik, teleximik qarasaasiatigut il.il. ingerlatsiviit ingerlatsinerlu, taakkulu **isumagineqassallutik Grønlands tekniske Organisationimit** Kalaallit Nunaanni nalunaarasuartaaseriveqarfikkut, Inatsisartut aningaasanut inatsisaanni aalajangersarneqartumik atugassiissutit malillugit.”(Matumani erseqqissarneqartoq)*

TELE Attaveqaatit aktiaateqarluni ingerlatseqatigiiffinngortinneqarnera pillugu Inatsisartut peqqussutaat nr. 11, 28. oktober 1993-meersumi nalunaarasuartaateqarneq aktiaatileqatigiiffimmik, TELE Attaveqaatit A/S-imik (nalunaarasuartaateqarnermut ingerlatseqatigiiffik), pilersitsinikkut avissaartinneqarpoq. 1. januar 1994 Nalunaarasuartaateqarnermut ingerlatseqatigiiffiup suliat maannamut GTO-mit ingerlanneqartussatut pisussaaffiliunneqarsimasut TELE Attaveqaatini (nalunaarasuartaateqarneq) suliarisussanngorlugit tiguai.

Misisueeqqaarnerit pillugit Inatsisartut peqqussutaat nr. 18, 28. oktober 1993-imeersumi misissueeqqaarnernik suliaqarnerit Misissueeqqaarnernut nuutinneqarput. Inatsisartut peqqussutaat malillugu Misissueeqqaarnerit Namminersornerullutik Oqartussat ataanni suliffeqarfittut imminut ingerlatsitatut aaqqissuusaalerpoq, taamaalillunilu GTO-p aaqqissuussaaqqaarnerani ilaajunnaarluni. Peqqussummi § 2, imm. 3-mi aalajangersarneqarpoq suliffeqarfik pisortamit Naalakkersuisunit toqqarneqartumit aqunneqassasoq.

Nukissamik pilersuineq pillugu Inatsisartut peqqussutaat nr. 14, 6. november 1997-imeersumi (nukissamik pilersuineq pillugu Inatsisartut peqqussutaat) oqartussat nukissiamillu pilersuinermut suliffeqarfift nukissiamik pilersuinermut suliassaqarfianni suliassat aalajangersarneqarput. Inatsisartut peqqussutaanni § 12-imi aalajangersarneqarpoq, Nukissiorfiit innaallagiamik ungasianiillu kiassarnermik atuisartunut pilersuineq isumagisarissagaa. Inatsisartut peqqussutaat

malillugu suliassat § 12-imi pineqartunut ilaasut suliffeqarfimmit pioerersumit Nukissiorfinnit isumagineqartussaapput. Tassa imaappoq suliffeqarfimmit imminut ingerlatsitamit Grønlands tekniske Organisationimik, GTO, ulloq 1. januar 1987 tigusisumit, taanna malillugu Grønlands tekniske Organisationi pillugu Inatsisartut peqqussutaanni § 3 suli atuulluni.

Imermik pilersuineq pillugu Inatsisartut peqqussutaat nr. 10, 19. november 2007-imeersumi oqartussat aamma imermik pilersuinermut suliffeqarfiit imermik pilersuinermut suliassaqarfimmi suliassat aalajangersarneqarput. Inatsisartut peqqussutaanni § 3-mi Nukissiorfiit illoqarfinni nunaqarfinnilu imermik pilersuinermut nuna tamakkerlugu pilersaarusiornermik suliaqarnissamik pisussaaffilerneqarpoq. Inatsisartut peqqussutaat malillugu tunngavissaatinneqarpoq suliassat § 3-mi pineqartunut ilaasut suliffeqarfimmit atutereersumit Nukissiorfinnit isumagineqartussaasut. Tassa imaappoq suliffeqarfimmit imminut ingerlatsitamit Grønlands tekniske Organisationimik, GTO, ulloq 1. januar 1987 tigusisumit, taanna malillugu Grønlands tekniske Organisationi pillugu Inatsisartut peqqussutaanni § 3 suli atuulluni.

Peqqusummi § 4-mi makkua allassimapput:

*"§ 4. Atuisut innaallagissamik kiammillu pilersorneqarnerat Nukissiorfiit isumagissavaat, § 12 naapertorlugu.*

*Imm. 2. Kiisalu Naalakkersuisut erseqqinnersumik aalajangersagaat malillugit suliassat allat Nukissiorfiit isumagissavaat.*

*Imm. 3. Nukissiorfiit aqunneqarnerat aaqqissuussaanerallu aamma suliffeqarfiup Naalakkersuisullu akornanni pissutsit pillugit Naalakkersuisut malittarisassiorlassapput."*

Naalakkersuisut pingarnertigut Nukissiorfinni aqtsineq ingerlatsinerlu akisussaaffigaat aammalu suliffeqarfiup ingerlatassat suliassallu suliffeqarfimmut pisussaaffiliunneqartut ingerlannerai nakkutigisussaallugu.

Assersuutigalugu Naalakkersuisut aalajangiinissaannut, suliffeqarfimmut aqutsisunik qullersanik atorfinitssinissamut soraarsitsinissamullu Naalakkersuisoqarfik inassuteqartarpoq. Suliffeqarfimmi sulisut allat Namminersorlutik Oqartussat aamma kattuffiup isumaqatiginniarsinnaatitaasup pineqartup akornanni isumaqatigiissutit atuuttut naapertorlugit suliffeqarfimmi aqutsisunit atorfinitssinneqartarput soraarsinneqartarlutillu.

Nukissiorfiit aammattaaq suliffeqarfiup ingerlatsinermut sanaartornermullu suliassaannik aaqqissuussineq, allaffissornikkut aqtsineq aningaasaqarnermillu aqtsineq nammineerluni isumagisarai.

Suliffeqarfiup imminut ingerlatitap Naalakkersuisoqarfiullu akornanni aalajangiisinnaatitaanerup agguagaanera pillugu makkua Inatsisartut ombudsmandiata nalunaarutaani 1999-imeersumi allassimapput:

*” Pisortaqarfiup suliffeqarfiullu tapiiffigineqartarluni imminut aquttup akornanni pisinnaatitaanermut tunngasut aalajangersarniarnerat ataatsimut isigalugu ajornakusoortorujussuovoq, tassami taaguut “suliffeqarfik tapiiffigineqarluni imminut aquttoq” aningaasaliissuteqartarnermut tunngasuummat.*

...

*Ingerlatsinermi inatsiseqartitsinermut tunngasut pillugit.*

*Suliffeqarfik tapiiffigineqartarluni imminut aquttoq pisortaqarfiup iluani ingerlatsinermi oqartussaasutut nammineq ingerlasutut isigineqarpoq. Suliffeqarfik pisortaqarfiup ilaginngilaa.*

*Pisortaqarfiup quillersariiaartumik inissitsetersimaneq tunngavigalugu aammalu ilitsersuisinnaanermut pisinnaatitaaffii inatsisitigut aalajangersagaanngitsumik suliassamik isumaginnittussanngortitaanermik tunngaveqarluni imaluunniit inatsit naapertorlugu pisinnaatitaanermik aalajangersaanermik tunngaveqarluni pisinnaapput.*

*Suliffiup pisinnaatitaanera pisortaqarfiup inatsisitigut aalajangersagaanngitsumik suliassanik suliariinnittussanngortitaaneranik tunngaveqarpoq.*

*Pisortaqarfiup, ingerlatsinermi quillersatut oqartussaasuusup, suliffeqarfiup siulersorneqarnera suliffeqarfiullu tapiiffigineqartarluni imminut aquttup ingerlanneqarnera pingarnerusutigut isumagisarivaa suliffeqarfiullu ingerlatassanik suliassiissutigineqartunillu ingerlatsinieranik nakkutilliisuulluni.*

*Assersuutigalugu suliffeqarfimmi tessani pisortatut quillersaasumik atorfinitisilernermermi aamma soraarsitsinermi pisortaqarfik Naalakkersuisunut aalajangiiffigineqartussamik inassuteqaateqartarpoq. Suliffeqarfimmi sulisut allat suliffeqarfiup pisortaanit atorfinitisinneqartarlillu soraarsinneqartarput, Naalakkersuisut kattuffiullu pineqartup akissarsiat pillugit isumaqatigiinniarsinnaatitaasup akornanni isumaqatigiissutit atuuttut malillugit.*

*Suliffeqarfiup tapiiffigineqartarluni imminut aquttup aaqqissuussaaneq, aqtsineq suliffeqarfiullu ingerlatsinikkut sanaartugassatigullu aningaasaqarnikkut aqtsinera aammattaaq nammineq isumagisarai.*

*Taakku saniatigut pisortaqarfiup suliffeqarfiullu tapiiffigineqartarluni imminut aquttup akornanni ilitsersuuteqarlunilu pisinnaatitaaneq pillugu isumaqatigiissuteqartoqarsinnaavoq.*

*Assersuutigalugu suliffiup ... pillugit pisortaqarfíup Suliffimmut ilitsersuutai taaneqarsinnaapput (...)”*

Grønlands tekniske Organisationi pillugu Inatsisartut peqqussutaat nr. 8, 19. december 1986-imeersumi § 3, imm. 2-mi allassimavoq Nukissiorfiit ”*pisortamit aqunneqassaaq Naalakkersuisunit atorfinitsinneqartumit*”.

Grønlands tekniske Organisationi pillugu Inatsisartut peqqussutaanni matuma siuliani taaneqartumi § 4-mi aamma nukissiamik pilersuineq pillugu Inatsisartut peqqussutaanni nr. 14, 6. november 1997-imeersumi (nukissiamik pilersuineq pillugu Inatsisartut peqqussutaat) § 4, imm. 3-mi allassimavoq Namminersorlutik Oqartussat Nukissiorfiit ”*aqunneqarnera*” aamma ”*aaqqissuussaanera*” pillugit maleruagassanik aalajangersaanissamut piginnaatinneqartut, taamatullu aalajangersakkami kingulliullugu taaneqartumi aalajangersarneqarpoq Nukissiorfiit aamma Namminersorlutik Oqartussat imminut attuumassuteqarnerat pillugu maleruagassanik ersarinnerusunik Namminersorlutik Oqartussat aalajangersaasinnaasut. Kisianili tassani suut ersarinnerusumik pineqarnersut aalajangersakkap piareersaalluni suliarineqarnerani ersarinnerusumik allassimasoqanngilaq, taamatullu ”*aqutsisut*” periusissatigut imaluunniit ulluinnarni aqutsisutut killissalersuisoqarani. Grønlands tekniske organisationi pillugu Inatsisartut peqqussutaanni § 3, imm. 2-mi tunngavissaatinneqarpoq Nukissiorfinni aqutsisut ataatsimoortut pisortaatitani inissisimasut.

Grønlands tekniske Organisationi pillugu Inatsisartut peqqussutaanni § 3, imm. 2-p oqaasertai eqqarsaatigalugit, taanna malillugu Nukissiorfiit ”*pisortamit Naalakkersuisunit toqqarneqartumit aqunneqarluni*”, Naalakkersuisut suliffeqarfimmi imminut ingerlatsitami aqutsisuni qullersaasut nalinginnaasumik aallaavigineqarneranut ataqtigisiillugu, Naalakkersuisut naliliipput Nukissiorfiit siulersuisunit pisortaatitanillu aqunneqartoq, tassani siulersuisut qullersatut aqtsineq akisussaaffigalugu, pillugu aalajangersakkanik nalunaarummi aalajangersaanissamut piginnaatitsissuteqarneq imminermini pisariaqartumik inatsimmi tunngavissaliinngitsoq.

### *2.1.1. Siunnersuut*

Nukissiorfiit Kalaallit Nunaanni pisortat ingerlatsineranni pineqartunut ilaatinneqarpoq aammalu naalagaaffimmi pisortallu ingerlatsinerannut inatsisitigut inatsisiniq tunngaveqarnermut tunngaviusut malittussaallugit. Tamatuma malitsigisaanik Namminersorlutik Oqartussat tamakkiisumik Nukissiorfiit pigisaraa nakkutigisaralugulu, taamaattumillu suliffeqarfik aamma Naalakkersuisoqarfíup toqqaannartumik ataaniippoq, tassani Naalakkersuisut suliffeqarfimmut aqutsisuni qullersaallutik, tamatumani inatsimmi imaluunniit inatsisini tunngavissani atuuttuni allani allatut aalajangersaasoqarsimanngippat.

Inatsisissatut siunnersuummi, Nukissiorfiit suliffeqarfimmi pisortaatitaareersut saniatigut siulersuisunit aqunneqarnissaat pillugu aalajangersakkanik aalajangersaasinnanissamut, Naalakkersuisut nukissiamik pilersuineq pillugu Inatsisartut peqqussutaanni § 4, imm. 3 malillugu nalunaarummik aalajangersaanissamut inatsimmi tunngavissalerneqarput. Allanngortitsinermi Nukissiorfinni siulersuisunik pilersitsinissamut Naalakkersuisut piginnaatitaaneranni killiliineq peerneqarpoq. Tamatumani nukissiamik pilersuineq pillugu Inatsisartut peqqussutaanni § 4, imm. 3-mi piginnaatitsissummut aalajangersakkap allanngortinnissaat naapertuutinnginnera eqqarsaatigineqarluni.

Inatsisissatut siunnersuut Grønlands tekniske Organisationi pillugu Inatsisartut peqqussutaanni § 3, imm. 2-p allanngortinneqarnissaanut siunnersummik matuminnga imaqarpoq:

*"Nukissiorfiit siulersuisunit pingaarnertigut aqtsinermik isumaginnittuuusunit, aammalu pisortamit ulluinnarni aqtsinermik isumaginnittuuusumik aqunneqarpoq. Siulersuisut Naalakkersuisunit toqqarneqassapput. Pisortaq siulersuisunit inassuteqaammik piniareernermik kingorna Naalakkersuisunit toqqarneqassaaq."*

Aalajangersakkanik, qullersatut periusissatigullu aqtsinermik siulersuisuni inissimalersitsisussanik, atuutsitsilernerup kingunerisaanik marloqiusamik aqtsinermut ilusiliisoqartussaavoq, aktiaatileqatigiiffinnit ilisimaneqartumik, takuuk aktiaatileqatigiiffiit piginneqatigiiffiillu pillugit inatsimmut danskit nalunaarutaanni (ingerlatseqatigiiffinnut inatsit) § 111. Taamaalilluni tamatuma kingunerisaanik ulluinnarni aqtsisut pisortaatitani inissimalissapput, qullersatut periusissatigullu aqtsineq siulersuisuni inissimalissalluni.

#### *2.1.2. Siulersuisut qullersatut aqtsisutut atuunnissaannut killissaliussat*

Siulersuisut pisortaatitallu atuunnissaannut killissaliussat ersarinnerusut nalunaarummi aalajangersarneqassapput, ilanngulligit siulersuisunut ilaasortat amerlassusaat, piffissaq toqqaaffiusussaq, siulersuisut suleriaasissaannik aalajangersaaneq kiisalu pisariaqarpat siulersuisuni ataatsimiititaliamik/ataatsimiititaliamik siunnersuisartussamik pilersitsineq.

Tamatuma kingunerisaanik siulersuisut suliffeqarfimmi qullersatut periusissatigullu aqtsinermullu ilapertuutaalissapput aammalu suliffeqarfimmi isumannaatsumik aaqqissuussaaneq qulakkiissallugu. Tassunga atatillugu siulersuisut inatsisini killissaliussat iluanni suliffeqarfimmi periusissatigut siunnerfiit aalajangersassavaat aammalu siunnerfiit taakkua angunissaannut aningaasaqarnikkut isumalluutinik kiisalu eqqortunik piginnaasaqartunik pisariaqartunik tunngavissaqarnissaq qulakkiissallugu.

Suliffeqarfimmi pineqartumi aqtsisut aaqqissuussaanaerullu eqqortuunissaasa qulakteernissaa, siulersuisut pingaarnertigut akisussaaffigaat.. Pisortaatitanik nakkutiginninnissaq aammalu

nakkutiginninneq taanna qanoq ingerlanneqassanersoq malittarisassanik aalajangersaanissaq siulersuisut suliassaraat. Tassunga atatillugu aalajangiinerit suut tunngaviusutut aamma/imaluunniit pingaaruteqartutut isigineqarnersut aammalu pisortaatitat siulersuisunit akuersissuteqarnissaq sutigut piniartassaneraat, nalinginnaasumik maleruagassiivigineqassaaq.

Tamatuma saniatigut suliffeqarfip aningaasaqarnerata aningaasaatinullu tunngaviisa ajunngitsuunissaasa qulakkeernissaa siulersuisut pisortatigoortumik akisussaaffigaat, ilanngullugu suliffeqarfimmi aningaasaqarnermut tunngasunik nalunaarusiorernik siulersuisut ingerlaavartumik tigusaqartarnissaat, taamaalilluni aningaasaatini upalungaarsimanerup tamatigut isumannaatsuunissa, eqqortumik naatsorsuutini allattuisarnissaq naatsorsuusiortarnissarlu qulakkeerneqassallutik, ilanngullugu akitsuutinik akileraarutinillu tamaginnik akiliisarnerit, ukiumoortumik naatsorsuutit akuerineqartarnissaat, aarlerinaataasunik aqutsinermut pisariaqartunik suleriaaseqarnissaq.

Nukissiorfiit aalajangersimasunik aalajangiinissamut Naalakkersuisunit akuersissuteqarfigineqarnissamut Nukissiorfiit pisussaaffeqartut, ullumikkut inatsimmi imaluunniit nalunaarummi inatsisit naapertorlugu aalajangersaasoqarsimappat, aalajangersakkat taamaattut atuutiinnassapput.

Siulersuisunut ilaasortat atuuffimminni suliassaminnik suliariinninnerminni piaaralutik imaluunniit mianersuaalliorlutik suliffeqarfik, Namminersorlutik Oqartussat imaluunniit allat ajoqusertippatigit, taakkua nalinginnaasumik taarsiinissamut pisussaaffeqalersinnaapput.

### **3. Pisortanut aningaasaqarnikkut allaffissornikkullu sunniutaasussat**

Siunnersuutip atuunnerani Nukissiorfiit siulersuisunut aningaasartuutit akilissavaat. Nukissiorfiit Namminersorlutik Oqartussat iluanni ingerlatsivimmi oqartussatut nammineertutut suli inissisimaannassaaq, suliassaqarfimmut inatsimmi nalinginnaasumi aammalu nukissiamik pilersuinermut suliassaqarfimmi inatsimmi immikkut ittumi maleruagassiivigineqarluni. Suliffeqarfip inuiaqtigiinni siunertaa allanngortinneqassanngilaq, aammalu Nunatta karsia suliffeqarfimmut tamarmiusumut suli akiliisussaqinnassaaq. Siulersuisut katitigaanerat aamma akissarsiassat aalajangersarneqarnerat, suliffeqarfip inuiaqtigiinni siunertaqarnera aammalu suliffeqarfip sinneqartooruteqartussaannginnera, suliffeqarfipullu aktiaatileqatigiiffit nalinginnaasut akerlianik unammilleqatigiissitsivigineqannginnera eqqarsaatigalugit pissaaq.

### **4. Inuussutissarsiortunut aningaasaqarnikkut allaffissornikkullu sunniutaasussat**

Siunnersuut inuussutissarsiortunut sunniuteqassanngilaq.

### **5. Avatangiisinut, pinngortitamut inuillu peqqissusaannut sunniutaasussat**

Siunnersuut avatangiisinut, pinngortitamut imaluunniit inuit peqqissusaannut sunniuteqassanngilaq.

## **6. Innuttaasunut sunniutaasussat**

Siunnersuut innuttaasunut aningaasaqarnikkut imaluunniit allaffissornikkut sunniuteqassanngilaq.

## **7. Sunniutaasussat allat annertuut**

Siunnersuut allanik annertuunik sunniuteqassanngilaq.

## **8. Oqartussanut kattuffinnullu il.il. tusarniaaneq**

Siunnersuut piffissami –10. juli – 10. august 2022 tusarniaassutigineqarpoq

### **Siunnersummi aalajangersakkanut ataasiakkaanut nassuaatit**

#### *§ 1-imut*

##### Nr. 1-imut

Nukissiorfinnut siulersuisunik pilersitsisinnaasut, aalajangersagaq inatsimmi tunngavissaliivoq. Siulersuisut pisortaatitallu atuunnissaannut killissaliussat ersarinnerusut nalunaarummi aalajangersarneqassapput, ilanngullugit siulersuisuni ilaasortat amerlassusissaat, piffissaq toqqaaviusoq, siulersuisut suleriaasissaannik aalajangersaaneq aamma siulersuisuni ataatsimiititalianik/ataatsimiititalianik siunnersuisussanik pilersitsineq. Nalunaarut nukissamik pilersuineq pillugu Inatsisartut peqqussutaanni § 4, imm. 3 naapertorlugu aalajangersarneqassaaq.

Siulersuisut inassuteqaataannik piniareernerup kingorna pisortaq Naalakkersuisunit toqqaarneqassaaq. Siulersuisut pissusiviusuni aalajangiisinnaatitaanissaat qulakteerniarlugu siulersuisut pisortamik atorfinitssissapput aammalu atorfinitssinissamut naliliisartunullu ataatsimiititaliatut atuuffik ingerlatissallugu. Taamaaliornermi pisortamik suliffeqarfip inuiaqatigiinni siunertaanut suliassaannullu naleqquuttumik toqqaanissaq qulakteerniarneqarpoq.

Nukissiorfiit suliffeqarfittut imminut ingerlatsitatut inissisimanerata kingunerisaanik siulersuisuni ilaasortanik toqqaaneq Naalakkersuisoqarfimmit suliassaqarfimmuit akisussaasuuusumit isumagineqarpoq.

#### *§ 2-mut*

Aalajangersakkami siunnersuutip atuutilerfissaa allassimavoq. Siunnersuutigineqarpoq inatsisip allanguutaa ulloq 1. januar 2023 atuutilissasoq.



<b>Siunnersuut inatsimmut atuuttumut sanilliullugu</b>	
<i>Oqaasertalerneqarnera atuuttoq</i>	<i>Inatsisisatut siunnersuut</i>
	<p style="text-align: center;"><b>§ 1</b></p> <p>Grønlands tekniske Organisationi pillugu Inatsisartut peqqussutaat nr. 8, 19. december 1986-imeersumi makkua allanngortinneqarput:</p>
<p>§ 3, imm. 2: ”Imm. 2. GTO pisortamit aqunneqassaaq Naalakkersuisunit atorfinit sinneqartumit.”</p>	<p><b>1.</b> § 3, imm. 2. imatut oqaasertalerneqarpoq: ”Nukissiorfiit siulersuisunit pingaarnertigut aqutsinermik isumaginnittuusunit, aammalu pisortamit ulluinnarni aqutsinermik isumaginnittuusumik aqunneqarpoq. Siulersuisut Naalakkersuisunit toqqarneqassapput. Pisortaq siulersuisunit inassuteqaammik piniareernermik kingorna Naalakkersuisunit toqqarneqassaaq”</p> <p><b>2.</b> Inatsisartut peqqussutaanni tamarmi ”Naalakkersuisut” uunga ”Naalakkersuisut”, ”Namminersornerullutik Oqartussat” uunga ”Namminersorlutik Oqartussat”, ”Namminersornerullutik Oqartussat suliffeqarfiat” uunga ”Namminersorlutik Oqartussat suliffeqarfiat” aamma ”Inatsisartut” uunga ”Inatsisartut” allanngortinneqarput. Aammattaaq §§ 2-mi, 3-mi aamma 4-mi ”GTO” uunga ”Nukissiorfiit” allanngortinneqarpoq.</p>
	<p style="text-align: center;"><b>§ 2</b></p> <p>Inatsisartut inatsisaat ulloq 1. januar 2023 atuutilerpoq.</p>

## **Ilanngussaq 2**

### **Tusarniaanermut allakkiaq**

**Unga siunnersuut: Grønlands tekniske Organisationi pillugu Inatsisartut peqqussutaata nr. 8, 19. december 1986-imeersup allanngortinneqarnissaa pillugu Inatsisartut inatsisaat.**  
(Nukissiorfinnut siulersuisunik pilersitsinissaq)

#### **Aallaqqaasiut**

Siunnersummi siunertaavoq Nukissiorfinnut siulersuisunik pilersitsinissamut inatsimmi tunngavissaqalersitsinissaq.

#### **Inatsisisatut siunnersummut nassuaatit nalinginnaasut**

Tusarniaanerup takutippaa siunnersuut ataatsimut isigalugu tapersorsorneqartoq.

Kattuffinnut, oqartussanut il.il. tusarniaaffigineqartunut takussutissiaq.

Inatsisisatut siunnersuut ulloq 10. juli 2022 tamanut ammasumik tusarniaassutigalugu nassiuunneqarpoq, ulloq 10. august 2022 tusarniaanermut killigitinneqarluni. Siunnersuut piffissami tassani oqartussanut, kattuffinnut, peqatigiiffinnut il.il. tusarniaaffigineqartut allattorsimaffianni allassimasunut nassiuunneqarpoq:

Avannaata Kommunia  
Kommune Qeqertalik  
Qeqqata Kommunia  
Kommuneqarfik Sermersooq  
Kommune Kujalleq  
KANUNUPE  
SIK (Sulinermik Inuussutissarsiueteqartut Kattuffiat)  
Sulisitsisut (GE)  
Mittarfeqarfiiit  
Nukissiorfiit  
Royal Arctic Line A/S  
Asiaq  
Grønlandsbanken A/S  
BankNordik  
Visit Greenland  
Transparency Greenland

WWF Greenland  
KNAPK  
Pinngortitaleriffik  
Timmiaq  
KNI  
Nunatta Katersugaasivia Allagaateqarfialu

Makkunannga tusarniaanermut akissuteqaat tiguneqarpoq

- Sulisitsisut (GE)
- Transparency Greenland
- Nukissiorfiit

Tusarniaanermut akissuteqaatit uani [www.naalakkersuisut.gl](http://www.naalakkersuisut.gl) tusarniaanermut nittartakkami tamanut saqqummiunneqarput.

### **Sulisitsisunit (GE) tusarniaanermut akissuteqaat**

GE allappoq:

*"Nukissiorfiit ingerlataqarfiinut ataqtigiuissillugu periusissatigut aqutsinermut tunngatillugu eqqortunik piginnaasaqartunik ilaasortanik toqqaanissaq, Nukissiorfiit siulersuisut iluaquitigissaneraat aalajangiisuulluinnartussaavoq. Naalakkersuisut pisortaq toqqartussaallugu, ilusiliineq immikkullarippoq. Taamatuttaaq siulersuisut Nukissiorfinnut periusissatigut anguniagassanik aalajangersaasussaanerisa saniatigut piginnaasaqarfiit akisussaaffiillu suut siulersuisuniinersut ersarinngilaq.*

*Erngup nukinganik innaallagissiorfiit sanaartornissaannut, aningaasalersornissaannut ingerlannissaannullu aktiaatileqatigiiffimmik nutaamik pilersitsinissamut taarsiullugu, Naalakkersuisut aamma Inatsisartut Nukissiorfiit aktiaatileqatigiiffinnngortinniarlugu imaluunniit SOV-inngortinniarlugu aalajangissappata, inatsisisstatut siunnersuut manna pisariaaruttussaavoq. Tamatuma kingunerissavaa pisortamik atorfinitssinissamut kiisalu suliassanik akisussaaffimillu siulersuisut aktiaatileqatigiiffimmi pisussaaffigisaannik isumaginninnissamut Nukissiorfiit eqqortumik siulersuisoqalernera.*

*Ingerlatseqatigiiffimmik "toqqortamik pisortat allaffissornerannik" annertunerusumik malitseqartumik suli allamik pilersitsinissamut sanilliullugu, Nukissiorfiit aktiaatileqatigiiffinnngortinnerani/SOV-inngortinnerani iluaquitissartaasut ajoqtissartaasullu Naalakkersuisut nalilersussagaat, Sulisitsisut inassutigissavaat*

### **Naalakkersuisoqarfiup oqaaseqaatai**

Nukissiorfiit suliffeqarfittut imminut ingerlatsitatut aalajangiusimaannarnissaa Naalakkersuisut kissaatigaat, taamaattumillu Nukissiorfiit aktiaatileqatigiiffinngorlugu imaluunniit Pisortat suliffeqarfiattut namminersortutut (SOV) allanngortinnissaanut Naalakkersuisut pilersaaruteqanngillat. Suliffeqarfittut imminut ingerlatsitatut politikkikkut aqunneqarneq, aammalu nunap karsiatu suliaqarnerannut toqqaannartumik akiliisussaanera, Nukissiorfinnut ilisarnaataavoq. Taamaattoq ingerlatsivimmi aqutsinerup nalinginnaasup paarlattuanik Nukissiorfiit pisuussutaannut tunngasut aammalu naatsorsuutnik saqqummiisarneq, nunap karsianut sanilliullugu ilaannakortumik immikkoorpooq.

Nukissiorfiit ullumikkut pisortaaqatigiinni pingasunik ilaasortaqtunit quillersatut aqtsisuusunit aqunneqarpoq. Siunnersuutip atuutilernerani Nukissiorfiit aqtsisui siunissami tassaalissapput siulersuisut, pingarnertigut periusissatigullu aqtsinermik isumaginnituusut aammalu aqtsisooqatigiit ulluinnarni aqtsinermik isumaginnituusut.

Nukissamik pilersuineq pillugu Inatsisartut peqqussutaat nr. 14, 6. november 1997-imeersumi § 4, imm. 3 naapertorlugu Nukissiorfiit aqunnerarnera aaqqissuussaaneralu il.il. pillugit aammalu suliffeqarfiup aamma Naalakkersuisut akornanni attaveqatigiinneq pillugu nalunaarummi maleruagassanik Naalakkersuisut aalajangersaasinnaapput.

Siulersuisut pisortaaqatigiillu atuunnerannut killissaliussat ersarinnerusut nalunaarummi aalajangersarneqassapput, ilanngullugit siulersuisunut ilaasortat amerlassusaat, piffissaq toqqaaviusartussaq, siulersuisut suleriaasiannik aalajangersaaneq il.il. Siulersuisut katitigaaneranni Nukissiorfiit inuaqatigiinni suliassanik isumaginnituunera, aammalu suliffeqarfik suli suliffeqarfittut imminut ingerlatsitatut aaqqissuussaasoq, takuneqarsinnaassapput.

Taamaalluni Nukissiorfiit atuisartunut innaallagiamik ungasianiillu kiassarnermik pilersuinermik isumaginniinnarnissaat siunnersuummi allanngortinnejingilaq, aammalu Nukissiorfiit allannguiteqanngitsumik nukissamik pilersuineq pillugu Inatsisartut peqqussutaat nr. 14, 6. november 1997-imeersumi aalajangersarneqartutut illoqarfinni nunaqarfinnilu atuisartunut inaallagiamik aamma ungasianiit kiassarnermik sunniuteqarluartumik naammattumillu attassitsinissamut pisussaaffeqarluni.

### **Transparency Greenlandimit tusarniaanermut akissuteqaat:**

*Transparency Greenlandip siunnersuut inassutigaa, kisianni aktiaatileqatigiiffiit Namminersorlutik Oqartussanit pigineqartut ilaqqinneranni siulersuisunut ilaasortanik toqqaasarnermut aammalu ingerlatseqatigiiffimi aqtsilluarnissamut malittarisassat nutarterneqartarnerannut tunngatillugu ersarissuutitsinissap pisariaqartinneqarnera sakkortunerulersinneqartussaasoq, peqatigisaanik eqqumaffigeqqussallugu.*

### **Naalakkersuisoqarfíup oqaaseqaatai**

Nukissiorfiit suliffeqarfittut imminut ingerlatsitatut aalajangiusimaannarnissaa Naalakkersuisut kissaatigaat, taamaattumillu Nukissiorfiit aktiaatileqatigiiffinngortinnissaanik Naalakkersuisut pilersaaruteqanngillat.

Nukissiorfiit Kalaallit Nunaanni pisortat ingerlatsineranni suli ilaatinneqartussaavoq aammalu pisortat ingerlatsineranni inatsisini nalinginnaasuni inatsisinik tunngaveqarnissamut tunngaviusoq malittussaallugu, tamatuma atuunnerani suliffeqarfíup suliassat inatsisitigut imaluunniit allatigut inatsimmi tunngavissamik atuuttumik tunngavilimmik taamaallaat suliarisinnaavai aammalu piginnaatitaanerit suliffeqarfímmut inissinneqartut kisiisa ingerlassinnaallugit.

Siulersuisut pisortaatitallu atuunnerannut killissaliussat erseqqinnerusut Grønlands tekniske Organisationi pillugu inatsisartut peqqussutaanni § 4-imi aammalu nukissamik pilersuineq pillugu Inatsisartut peqqussutaanni § 4, imm. 3 tunngavigalugit nalunaarummi aalajangersarneqassapput, ilanngullugit siulersuisuni ilaasortat amerlassusissaat, piffissaq toqqaaviusussaq, siulersuisut suleriaasiannik aalajangersaaneq il.il.

Nukissiorfiit siulersuisoqalersinneranni, taassuma maleruagassat ingerlatseqatigiiffinnut inatsimmi ilisimaneqartut assigalugit, suliffeqarfímmik qullersatut aqtsineq isumagisussanngussavaa. Tamatuma kingunerisaanik siulersuisut suliffeqarfímmi pingaarnertigut periusissatigullu aqtsineq akisussaaffigissavaat.

Nukissiorfiit suliffeqarfittut imminut ingerlatsitatut inisisimannerata aammalu suliffeqarfíup inuiaqatigiinni suliassanik pingaarutilinnik isumaginninnerata kingunerisaannik suliffeqarfímmut maleruagassiineq nakkutiginninnerlu suliassaqarfinni aalajangersimasuni ingerlatseqatigiiffinnut inatsit malillugu atuuttunit allaanerusussaavoq, ilanngullugu aamma Nukissiorfiit allatigut qanoq aningaasalersorneqarnersoq ingerlanneqarnersorlu. Tamatuma aamma atuunnerani suliffeqarfík "imminerminiiginnarnermut" tunngaviusoq malillugu suli ingerlanneqassaaq aammalu piginnittumut annertunerpaamik sinneqartooruteqartitsinissaq siunertarineqarani. Pissutsit taakkua aamma siulersuisunut ilaasortanik toqqaanermi pingaaruteqassapput.

### **Nukissiorfinnit tusarniaanermut akissuteqaat**

Nukissiorfiit inassutigaa "Naalakkersuisut allanguutissatut siunnersuummi Nukissiorfiit isertitaannik aningaasartuutaannillu imminerminiiginnarnissamut tunngaviusoq malillugu maleruagassiinissamut tunngaviusunik imaluunniit isertitanut killissaliussanut nalunaarummik, danskit pilersuinermut suliassaqarfianni ilisimaneqartutut, aalajangersaassasut. Nukissiorfiit aningaasartuutaannut annertunaaraluni imaluunniit annikinaaraluni matussusiisoqassappat, tamatuma siulersuisut akigititassanik maleruagassiinissamut periarfississavai, taamaalillunilu politikkikkut inatsisitigullu killissaliussat pingarnerit iluanni periusissatigut siunnerfiit angunissaannut tunngavigisassat pisariaqartut qulakkeerneqassallutik."

### **Naalakkersuisoqarfíup oqaaseqaatai**

Nukissamik pilersuineq pillugu Inatsisartut peqqussutaanni § 4, imm. 3-mut nassuaatini makkua allassimapput:

*"Nukissiamik pilersuinerup maleruagassiivigineqarnerani ilaatinneqartoq pingaaruteqartoq tassaavoq Namminersornerullutik Oqartussat aamma pilersuinermut suliffeqarfiit akornanni pissutsit.*

*"Naalakkersuisoqarfiit aamma nukissiamik pilersuinermut suliffeqarfiit akornanni pisariitsumik suliassanik agguaanerup qulakkeerneqarnissaa pisariaqartinneqarpoq. Naalakkersuisut suliffeqarfiit ingerlataannut nukissiornermut naalakkersuinikkut killissaliussanik aalajangersaasussaapput, suliffeqarfiit suliffeqarfiup aningaasaqarnerata sunniuteqarluarnissaa siunertaralugu nammineerlutik killissaliussat taakkua iluanni atugassiisinnaassallutik. Tamatumani illuatungeriit aalajangiisinjaatitaaffii pillugit paasiuminartunik ersarissunillu maleruagassaqarnissaq pisariaqarpoq".*

Nukissiorfiit suliffeqarfittut imminut ingerlatsitatut inisisimanerata aammalu suliffeqarfiup inuiaqatigiinni suliassanik pingaaruteqartunik isumaginninnerata kingunerisaanik, suliassaqarfinni aalajangersimasuni maleruagassiineq nakkutiginninnerlu ingerlatseqatigiiffinnut inatsit malillugu atuuttunit allaanerusussaavoq. Tamatuma aamma kingunerisaanik suliffeqarfik suli "imminerminititsinermut" tunngaviusoq malillugu ingerlanneqartussaavoq aammalu piginnittumut annertunerpaamik sinneqartooruteqarnissaq siunertarineqanngilaq.

Marlunngorlugu avitamik aqtsinermut ilusiliamik atuutsitsilernermi, piginnaatitsinerit suliassallu Nukissiorfinnut inissinneqartut iluanni siulersuisut Nukissiorfinnit periusissatigut aqtsinermik isumaginnissinnaanissaannik qulakkeerisinnaasumik, akigitanik maleruagassiinissamut killissaliussanut aammalu aalajangiisinjaatitaanerit agguagaanerannut siunnersuummik isummernissamut tunngavissiamik oqaasertalersuinissaq siulersuisut suliassarissavaat.